

春秋女誡

春秋全註

序

余於春秋世族旁引曲證廣爲蒐羅原以期其詳備故於譜系外復摘取稱爵稱人者彙而輯之其未稱爵稱人僅以國名見於春秋者亦彙而輯之摠附於後以見詳益求詳備益求備之意因思各國既有譜系其王后及諸侯之夫人妃妾子女與夫各國諸臣之若妻若妾若子女旁至姊妹舅甥姻亞之屬若無譜以維繫之亦不免仍有遺略爰復加考詳輯爲一冊名之曰春秋女譜其無名可稽而或因人因地因事以爲名者亦仍分國按年編次附於其末至若僅存虛名無可考證如桓六年子同生公與文姜命名之宗婦莊四年使覲哀姜之宗婦襄二年齊如魯送齊姜葬之宗婦莊十二年陳使飲南宮萬酒之婦人

宣二年晉殺宰夫使載以過朝之婦人成二年晉三子弔衛穆公哭於門內之婦人十七年齊慶克與蒙衣乘輦入門之婦人晉厲公田與先殺飲酒之婦人襄二十三年輦范宣子如公宮之二婦人哀四年齊簡公與飲酒於檀臺之婦人以及襄十一年鄭賂晉之女樂諸如此類不可枚舉俱無從徵實不得不槩事擯棄又如有仍氏女元妻爲樂正后夔所娶雖確有其人而非春秋之時亦不敢濫入何者是書爲譜作也爲譜春秋之女作也爲譜作則無可譜者又惡能從而譜之耶爲譜春秋之女作則非春秋之女子抑又何必從而譜之耶是爲序

道光二十年歲次庚子夏五月朔日祥符常茂徠秋厓并識

春秋女譜目錄

周

魯

晉

衛

鄭

齊

宋

楚

秦

陳

蔡

杞

紀

息

芮

莒

許

邾

小邾

鄆

鄆

鄒

江

徐

邳

潞

附
曹

賈

吳

各國無名雜婦女

周

魯

衛

鄭

齊

宋

莒

春秋女譜目錄終

春秋女譜

祥符常茂徠秋厓編輯

周

后
附妾

紀季姜

桓王后紀女姜姓桓八年逆九年歸于京師

王姚

莊王嬖妾未詳何國女生子頽見莊九年

陳嬀

惠王后陳女嬀姓生襄王及王子帶莊十八年逆

隗氏

襄王后狄女見
僖二十四年

王后

定王后齊女姜姓宣六年傳召桓公逆王后于齊不詳稱名
按齊惠公立於文十八年卒於宣十年此王后當爲惠公女

王后

靈王后齊女襄十五年經劉夏逆王后于齊不詳稱名按
齊靈公立於成十年卒於襄十九年此王后當爲靈公女

穆后

景王后未詳何國女生
太子壽昭十五年見崩

王女

王姬

莊王女齊襄
公夫人詳齊

王姬

莊王女齊桓
公夫人詳齊

王姬

惠王女宋襄
公夫人詳宋

魯

夫人

妾哀二十四年傳釁夏對公曰周公及武公娶于薛孝
附惠娶于商自桓以下娶于齊○商卽宋也稱商避定

孟子

惠公元妃宋女
子姓在春秋前

聲子

惠公繼室卽孟子之姪娣亦宋女生隱公在春秋前隱公三
年卒傳曰君氏卒蓋隱公攝位不敢從正君之禮尊其母避

正夫人故書
曰君氏卒

仲子

惠公再娶夫人宋武公女生桓公在春秋前隱二年薨經書夫人子氏薨穀梁傳謂夫人者隱之妻也按經書夫人子氏薨分明與莊十一年莊公母文姜卒書夫人姜氏薨文十六年文公母聲姜卒經書夫人姜氏薨襄九年成公母穆姜卒經書夫人姜氏薨襄二年襄公嫡母齊姜卒經書夫人姜氏薨皆一例如是隱公夫人隱公之母聲子卒在三年經書君氏卒何始而於其妻稱之爲夫人而書曰薨旣而於其母反不尊之爲夫人而書曰卒耶若謂此君氏公羊傳作周大夫尹氏非隱公之母而隱公乃暫攝君位觀於羽父請殺桓公公曰爲其少故吾將授之何等循禮豈有於其妻之卒而忍越禮犯分遽加以夫人之號而書曰薨乎

文姜

桓公夫人齊僖公女桓三年逆生莊公及季友莊二十一年薨

孟任

莊公夫人魯大夫黨氏女任姓生子般及女公子見莊三十二年

哀姜

莊公夫人齊女莊二十四年逆閔二年齊人殺之按齊桓公立於莊九年卒於僖十七年此哀姜當爲桓公女

叔姜

莊公夫人哀姜之娣生閔公見閔二年

成風

莊公妾須句國女風姓生僖公見閔二年文四年薨○按閔二年成風註莊公之妾文四年經夫人風氏薨註僖公母杜譜曰凡妾子爲君其母猶爲夫人雖先君不命其母母以子貴其嫡夫人薨則尊得加於臣子而內外之禮皆如夫人故姒氏之喪責以小君不成成風之喪王使會葬傳曰禮也凡妾子爲君而得稱夫人者例此

聲姜

僖公夫人齊桓公女生文公及女叔姬見僖十七年文十六年薨○公羊作聖姜

出姜

亦稱哀姜

文公夫人齊女文四年逆生惡及視文公薨襄仲殺惡及視而立宣公夫人姜氏歸于齊按齊孝公卒於僖二十七年弟昭公繼立卒於文十四年此出姜當爲昭公女否則爲孝公女

敬嬴

文公二妃未詳何國女生宣公及叔肝見文十八年宣八年薨○公穀俱作頃熊

穆姜

宣公夫人齊女宣元年逆生成公及女宋伯姬襄九年薨○杜氏曰計公衡之年成公又非穆姜所生不知其母何氏也宣公元年娶穆姜成公二年公衡爲質公衡成公子也如成公爲穆姜所生亦未得有長成之男也○按穆姜當爲齊惠公女惠公爲懿公之兄懿公弑舍自立立四年至文十八年被弑惠公立立十年至宣十年卒計惠公繼立之時其年必長以此推之當爲惠公女矣

齊姜

成公夫人襄公之嫡母齊女成十四年逆襄二年薨○按齊頃公卒於成九年子靈公繼立卒於襄十九年此齊姜若非

靈公女必
爲頃公女

定姒

成公妾杞女生襄公見襄
四年薨○公羊作定乙

敬歸

襄公妃胡女歸姓生
子野見襄三十一年

齊歸

襄公妾敬歸之娣生昭公見
襄三十一年昭十一年薨

孟子

昭公夫人吳女諱娶同姓
謂之孟子見哀十二年

公衍母

公爲母

俱昭公妾見昭二
十九年氏未詳

定姒

定公夫人杞女生哀公見
定十五年○穀梁作定乙

公子荊母

哀公嬖妾見哀二
十四年氏未詳

公女
女公子附

紀伯姬

惠公女紀國
夫人詳紀

紀叔姬

惠公女紀
子妃詳紀

杞伯姬

莊公女杞惠
公夫人詳杞

莒叔姬

莊公女莒大
夫慶妻詳莒

女公子

莊公女見前孟任註未
知爲杞伯姬莒叔姬否

伯姬

僖公女見僖九年卒未適人
公穀曰未適人故不稱國

宋蕩伯姬

僖二十五年經書宋伯姬來逆婦杜註伯姬魯女宋大夫蕩
氏妻也自爲其子來逆婦按蕩伯姬當爲僖公女伯姬歸宋
經雖無明文而逆婦在僖二十五年則亦正當有子可室之
時世族譜以爲宣公女宣公爲僖公之孫惡能卽有女爲子
逆婦在僖之二十五年乎譜不能無錯悞也○嚴豹人春秋
內傳古註輯存云按宋桓公生公子蕩其孫意諸始以蕩爲